

皇
清
奏
議

皇清奏議卷三十一

酌籌長江水師營制疏雍正十年

尹繼善

署理江南總督巡撫江蘇等處地方提督軍務兼理糧餉都察院右副都御史臣尹繼善謹奏為備陳長江情形酌籌水師營制仰懇

聖訓事竊惟長江跨連數省通

湖達海最關緊要沿江上下水陸營汛星羅棋布規制恭嚴但立一營必得一營之實濟有一兵必收一兵之實用方為措置得宜緩急足恃臣荷蒙

聖主深恩署理總

督印務懼職任之難盡恨營伍之廢弛數月以來竭力整頓設法稽察務期技藝純熟汛防嚴密以無負我皇上教訓期望之至意而兩江水師情形多係有名無實臣悉心諮訪通身籌畫其中未妥之處愚見所及有不敢不據實陳奏者京口為江淮鎖鑰南北咽喉將軍親標兩營

駐劄府城俱係陸路江陰副將左右兩營雖係水師止守沿江汎地所有京口沙船五十六隻艍船三十二隻配搭八旗官兵乘坐操演實為江省水師之重鎮今查兩項戰船共水兵一千四百餘名却為將軍親標陸路兩營管轄陸路將弁既不熟諳水性且船隻水手駐劄之高子港去鎮城數十里不能兼顧除春秋兩操而外俱各游手好閒不但無人訓練亦且並無器械徒有兵名究無實濟此京口水師不妥之情形也江寧為省會重地襟帶長江居京口狼山上游從前並無水師雍正五年欽奉諭旨

令江寧駐防滿洲官兵學習水師部議於八旗滿洲蒙古馬兵內挑選一千名派協領四員佐領防禦驍騎校各十二員撥京口將軍標沙船二十隻共水手三百餘名令江寧將軍督率每逢春秋二季操演八旗官兵實為有益但

教習水兵必得設有專員當日部議止令於鎮江千把內
揀選四員遇水操之時令其前往江寧分配旗員教習至
止操之時仍回原任無論暫時派撥之員並無責成難收
實效即鎮江千把亦不能教習水師而佐領等官不能熟
諳旗下事多不能在城外彈壓雖輪班照看並無專責至
今三百餘兵不但未置器械未習技藝且家眷仍在鎮江
高子港春秋臨時應差其餘之日多半來往京口而經營
旗員除捕盜舵工之外尚不能熟識一旦需用官兵俱不
聯合人船總不湊手此江寧水師不妥之情形也狼山為
長江尾閘大海門戶總兵親標三營有戰船二十二隻定
例春秋出洋操練江汛每月會哨過年以來狼山營伍疎
懈春秋不過駕沙唬船數隻每船配兵數名並不出至大
洋止於江口來往幾次草率塞責水面不能熟嫻焉能衝

風破浪至於江汛會哨虛應故事止以空文具報會與不
會漫無稽查更可異者趕造大船原係出洋利艘而竟泊
於狼山港內高擱沙灘從不出洋操練廢棄戰船虛糜糧
餉此狼山水師廢弛之情形也見在狼山營務臣已面交
署總兵王廷梅令其逐事詳稟徹底清查將船隻之安放
不妥者擇地位置水兵之漫無紀律者教以技藝並諭以
會哨之法令其實力操演臣復派員前往監查務必力挽
積習實心整理外其京口將軍標水兵一千餘名若不另
行籌畫難收實用請將現在住高子港水兵一千四百餘
名另設水師都司一員千把各一員駐劄高子港專管船
隻督率水師並歸江陰水師副將兼轄除春秋與旗兵合
操外閒暇之時即教習藤牌挑刀各種技藝則駕船之水
手即精練之勁兵操船則馳縱江洋停操並可資防禦庶

無用者咸成有用矣江寧將軍船隻俱在江邊停泊其水兵三百餘名因無棲身之所前將軍鄂彌達曾經商酌臣已撥與隙地似宜酌蓋營房將水手家眷搬至江寧以免數百里往返奔走請另設水師守備一員把總二員專司其事仍歸將軍統轄其素日管理水師旗員仍令兼管除配八旗官按期操演外平時責成守備看管船隻教習兵丁技藝與西岸浦口營相為對峙再添吧吡船數隻以便巡緝則城外江邊又有營頭防守實為嚴密抑臣更有請者江寧京口旗下官兵雖一年兩次操演而此外總不駕船終難熟諳以後京口江寧應每月各於佐領協領等官內派出二員輪駕船隻酌帶兵丁巡查江面其狼山鎮標除專管海汛之右營官兵每月駕船巡視海面外中左兩營亦宜每月輪派將備駕沙唬船二隻於江面游巡如此

則水手得以熟習旗兵又可勤練而長江數千里形勢連絡遠近聲援庶於武備少有裨益矣

請格外賑恤災黎疏

雍正十一年

張廷玉

經筵講官少保保和殿大學士兼管吏部戶部尚書翰林院掌院學士臣張廷玉謹 奏為懇 恩格外賑恤以

廣 皇仁事

我 皇上至仁如天自臨御以來旰食

宵衣勤求民隱欲使溥海內外無一夫不獲其所臣日侍 彤墀知之更為親切本月十日蒙 恩給假回籍舉

行先臣祀典由京師啟程經由北直州縣訪察地方情形知秋成豐稔之處頗多惟近河低窪之地遭值水患仰蒙

天恩賑濟窮黎得以存活黃童白叟無不感激涕零但被水州縣輕重不同其中有偏重之處已歷數月積潦未消難以佈種二麥失業之民竟有輕去其鄉覓食異地

者目前如此恐明歲二三月間青黃不接之際閭閻自信
覺艱難倘蒙 聖恩敕令督臣詳確查明仿照從前江

南山東等處之例於明春例應停賑之後加賑兩月或四
十日再 敕督臣河臣查該地方若有應修之工程酌
議舉行並將轉徙異鄉者給與口糧招致回籍如此則窮
民於領賑之外又傭工以餬其口一家老幼俱得養濟更
屬 聖主浩蕩之鴻施矣

謹籌便民買食之法疏 雍正十一年 鄂彌達

總督廣東等處地方軍務兼理糧餉都察院右副都御史
臣鄂彌達謹 奏為謹籌便民益貧民買食之法仰冀

睿鑒事竊查米價騰貴皆由囤戶居奇彼等開張米舖惟
利是圖往往捏作謠言增長米價或云風為旱兆或云雨
係水徵一日之間頻增價值一店長價諸店皆然名曰齊

行莫敢異議富民家有蓄積任其高抬於己無損惟手藝
貧民終日拮据不供口食羞肩挑負販為人傭工一日所
得無幾即遇官府有平糶倉穀不過一升半升日糶日食
而已無力多買又不能戶戶有碾米之具且以終日鹿鹿
並無餘暇故宜責價向米舖糶米非不知官責穀石價賤
不得已也若欲惠此貧民無如官開米局臣生長京師目
擊八旗自 皇上降旨設立米局以來歷年米價皆未
昂貴總由米局價平故國戶不能射利法良意美實可通
行伏念粵東省會之區貧民待哺尤衆奸民乘機射利往
往高價病民臣擬於粵東省城設立米局三處南門設一
米局動廣州府倉穀以該府倉大使管理東門設一米局
動番禺縣倉穀以該縣典史管理西門設一米局動南海
縣倉穀以該移駐之縣丞管理各局將日逐糶賣數目每

日招報各管府縣稽查該府縣十日一報司道存案仍令糧驛道不時稽查察其米價則額定倉斗一兩一石永成定例無減無增倘市價減至一兩以內仍聽民向各店買食市價稍昂即照定價一兩糶賣其赴局零買者用銀用錢聽隨民便仍不許買至一斗以外致啟販賣之端賣出價銀則令隨便赴穀賤地方採買源源轉運夫價有定額則胥吏無所容私局既常開則囤戶無能專利一切肩挑負販傭工覓食之人三五零錢取攜皆便矣至各府郡城即將府食穀石碾米開局比照省局之例仍責令該管道員稽查似亦可以一體通行伏祈 皇土睿鑒

備陳丹河疏濬之難疏 雍正十一年 史貽直

署理巡撫陝西等處地方提督軍務兼理糧餉都察院右副都御史臣史貽直謹 奏為備陳河道疏濬之難仰祈

睿鑒事本年八月二十八日准戶部咨湖廣督臣邁
柱奏請疏濬荆子關至龍駒寨一帶河道經廷議交臣相
度情形乘此冬月之時估工動帑以垂久遠之計以紆輓
運之勞臣遵即檄委潼商道商州知州等前往龍駒寨荆
子關一帶河道相視地形詳觀水勢勘丈灘口估計工程
隨據該道等繪圖繕冊詳覆前來臣細加查核只就見在
河身平淺之時量為疏濬計用夫匠三十五萬一千六百
九十工合動帑銀一萬八千三百九十三兩零臣仰體

皇上利濟民物之懷建萬世平成之績敢不悉心籌畫
以為一勞永逸之圖但河道實有難於疏濬之處敬為
皇上陳之伏查秦省商州所屬之龍駒寨至河南之荆
子關中間一水名曰丹河南源秦嶺南瀝潯川夾乎兩山
之間乘其上流之勢紆回曲折經途有三百七十里之遙

湍激奔騰灘流有一百八十處之險無旁支以蓄洩無他
道以疏通其最險者危巖陡削巨石星羅飛瀑狂瀾衝沙
走礫工匠無駐足之地斧斤無鑿鑿之方次險者水溜稍
平而淤沙壅塞山根稍遠而亂石縱橫欲將淤沙挑挖則
河泓一線無隙地可以容沙欲將亂石搬移則壁立兩崖
無平原可以疊石若聚沙於山脚則怒濤一刷沙仍壅滯
於水中若積石於河干則高浪千層石復漂流於灘底況
夏秋之間豫陝兩省農民均藉丹水灌田各處築堰蓄流
涓滴不容滲漏唯餘中泓一線輓運實難至若積雨之後
山水驟發田間各堰盡開百谷奔流頃刻水高丈許此時
衝斷絳路人力難施徒步者尚裹足而不前操舟者益望
洋而驚阻所以自古迄今丹河之水聽其自然設有輓運
之事唯當隨時疏濬從無永遠通利之方在督臣邁柱此

奏原為運道民生起見意非不善奈伊達在楚糧未能洞悉其形勢臣身當職守豈敢冒昧以經營訪之士人參之與論皆曰天定無假人為臣何敢罔恤民勞虛靡國帑再查督臣邁柱所奏原為輓輸楚米起見但臣前因楚米水陸輓運均屬艱難曾經奏請停運並請於豫省之河南府及陝州沿河各屬積穀二三十萬石以為陝省源源接濟之用業經奉 旨俞允欽遵在案是此後現有豫省積穀可以就近輓輸不必再運楚省之糧則疏濬此河尤屬可緩伏祈 皇上俯准停止興工則民力不致徒勞而國帑亦可節省矣

籌禁燒鍋疏

雍正十一年

史貽直

署理巡撫陝西等處地方提督軍務兼理糧餉都察院右副都御史臣史貽直謹 奏為欽奉 上諭事竊臣承

准大學士張廷玉寄字內開雍正十一年五月十二日奉

上諭聞得陝西之三原涇陽咸陽渭南富平等縣燒鍋各以千計其餘州縣亦皆有之朕思燒鍋既多必將糧食耗費甚屬無益但恐遽令禁止又滋煩擾爾可寄信與署撫史貽直等令其悉心籌畫若禁止不致累民則禁之為便抑或多方勸諭令其醒悟不期禁而自止是惟封疆大臣斟酌行之不可強迫欽此等因到臣跪讀之下仰見皇上愛養黎元敦本重農之至意伏查燒鍋一項西北各省所在有之祇因小民圖利往往舍本逐末臣前歲蒞任即檄行所屬地方各官不時查禁在案兩年以來各處燒鍋已減去十之七八臣思欲杜燒鍋之原當嚴造燒鍋之禁民間每於麥收之後不以積貯為急務而以晒麴為生涯所費之麥不可數計惟嚴禁造麴則燒鍋不禁而

自止矣然陝省糧食之耗散不僅由於本省之燒鍋而在於晉商之販囤陝西每遇豐收之年則晉省富商豫將資本散給於西鳳之農民農民貪取目前之現價不顧日後之盈虛一至糧食登場悉聽晉商搬運以致糧食耗費蓋藏空虛臣稔知各種情弊見於今歲麥收之時遍行出示剴切曉諭毋許民間私自造麴更於晉商販運之要路委員前往稽查不許糧食私販出境見今陝西省糧食可免耗費之虞惟是秦民艱於生理往往日用之需以為餬口之計倘本地糧食充裕百姓藉燒鍋以覓微利亦屬謀生一道若欲概令禁止則誠如 聖諭不無煩擾臣仰體天心惟當因時酌量視年歲之豐歉審民力之盈虛或出示嚴禁或多方勸諭務使閭閻有蓄儲之需草野有資生之策庶於國計民生均有裨益矣

請推廣免追兵餉之恩疏 雍正十一年邁 柱

總督湖廣等處地方軍務兼理糧餉都察院右副都御史
臣邁柱謹 奏為請 旨事竊臣於上年八月即報中

伏請

上諭聞北路所派四省綠旗官兵數年以來有

陸續在軍前病故者今年七月間該管將弁始接到部文
而各家口前所領月餉例應病故之日追出歸入截曠項
內朕思國家養育兵丁加恩優渥而出征身故之兵丁尤
朕所格外矜憫者其未奉文之前家口所領月餉此時安
有力量可以措辦交官此項月餉悉著加恩免其追還欽
此仰見 皇上加恩於出征病故之兵丁至優且渥臣
查楚兵赴陝出口以來亦有軍前病故者原營奉文開除
已隔數月行追家口長支糧餉併追故丁名下豫借庫銀
該家口俱以貧苦無依哀懇免追誠如 諭旨其未奉

文之前家口所領月餉無力措辦交官事同一轍但北路四省兵丁遇有軍前病故免追家口長支糧餉出自

特恩未見部文通行臣下亦未敢援引然同一出征身亡

之兵丁自當共需 皇恩一例邀免今楚兵遇有軍營

病故者議動司庫三分耗羨銀兩裁給新兵家口併補還

故丁之豫借庫銀咨明戶部允行在案臣轉思楚省如此

辦理已經推廣 聖恩而別省尚有出征兵丁不知作

何辦理仰懇 聖主洪慈再頒 諭旨宣示各省遇

有出征兵丁在軍前病故者照北路四省及楚省見行之

例將家口長支月餉併故丁豫借庫銀一概免追准動該

省存公銀兩支給還項則 皇恩浩蕩無處不周矣

請加惠邊兵疏 雍正十一年 劉於義

刑部尚書署理陝西總督兼辦軍需事務臣劉於義謹

奏為懇

恩格外施仁加惠邊兵事臣蒙

皇上簡

任陝西總督到陝以後仰體

皇土軫恤兵民至意時

時留心訪察陝甘二省雖俱承辦軍需而總漕之區惟涼
甘肅三處尤要查涼甘肅百姓有土地之家所收糧石草
束年來價值昂貴頗可自給其無土地者運糧割草及僱
覓傭工俱有腳價工價可以營生惟甘州提督所統及涼
肅安西三鎮之兵甚覺貧苦蓋緣兵丁糧餉俱有定額往
時糧一二兩一石者今價至十數兩是一日而食數日之
糧矣往時料兩許一石草一二分一束者今價增數倍是
一馬而食數馬料草矣即如肅州鎮守兵每名月餉九錢
計日得銀纔有三分耳今肅州之米至十三四兩一石是
其數日所得止可糴米二三合方且自給不贍而尚能養
父母妻子乎所以肅州之兵有嚴寒而衣履破爛者豐歲

而面帶饑色者此臣之所目覩近又得署甘提臣劉世明與臣書有馬匹則疲瘦殘廢兵丁則鳩形鵠面之語以此而推則涼州安西亦可想見矣伏念我

皇上加恩兵

丁至優至渥即如蠲免甘省銀糧草束悉折中定價不敷糴買加增糧料草束價值動費數十萬帑金此外別無再可施

恩之法臣日夜籌畫欲為兵丁久遠培植之計

查見在童華開墾九家窩原報墾籽種一千石王全臣開墾瓜州原報墾籽種二千石臣又咨明孔毓璞將大灣小灣零星鹹薄地畝今歲不必佈種使水全注瓜州將來瓜州開墾地畝必多此外倘有餘水得以灌溉地畝及他處或有可以開墾地畝肅州安西二鎮臣仰懇

皇上各

借給籽種五百石之價併製買牛隻農具之費臣約估每鎮須得銀六千兩令各鎮兵丁或伊弟男子姪耕種其銀

於本年冬季及甲寅年冬季分作兩次扣還嗣後於每年
秋收之時即豫留下年籽種此外餘剩糧石責令鎮標中
軍遊擊經管每年於青黃不接之時以濟兵食耕種之後
令總兵官時常覓察毋致荒廢至甘提涼鎮臣委員見在
查勘荒地將來開墾之日亦照此例而行此外沿邊各營
堡倘有兵丁欲墾地畝而無力者許營弁報明飭令地方
官勘實取具各營官弁印結亦准借給牛種農具之資於
秋成後分二季還官在國帑原屬無虧而邊兵永遠受利
如此培養數年士飽馬騰加之慎選將弁整頓釐剔邊兵
不畏霜雪習於勞苦風土淳樸忠勇可用此即我 皇
上京甘肅之長城不必調兵他省而職除小醜綽綽有餘
裕矣

皇清奏議卷三十一

皇清奏議卷三十二

一 請定保舉之責成疏 雍正十一年 索柱

經筵講官內閣學士兼禮部侍郎大理寺卿署都察院左副都御史加一級臣索柱謹 奏為請定保舉之責成以示鼓勵以收實效事我 皇上念切民依以實心行實

政尤以得人為致治之要務每投一官必詳加簡閱量才補用而各省見出之缺時督撫等遞行題補蓋欲於所屬人員內舉其所知庶人缺相當實有裨益也為督撫者自無不仰體 聖心矢公矢慎以期無負信任之深恩臣

愚以為由藩臬以及道員離督撫甚近猶易知其賢否至若府州以下等官去省較遠接見有期其居官之優劣得諸訪聞者已原未確又或因其一時一事之有合意指親友左右之傳說贊揚即深信而保題之更恐迎合請托諸

弊叢生所以保題未久而參劾加之檢舉隨之者不少夫自保自參督撫中之公正者能之而地方已莫收得人之效若稍加姑息回護則民間之受累更多又何能仰答

皇上急欲得人之盛心耶請特頒 諭旨令督撫等

或奉 旨題補或遵例保題悉照糾參屬員劾實列款

之例保題道府各官取具兩司確結保州縣等官取具府道確結務將該員任內如何振興學校勸課農桑如何緝盜安民除奸去蠹如何清理錢糧積貯賑荒務舉一二端之優長悉載有徵驗之實事一併敘入本內具題不得以才堪肆應明敏練達年富力強熟悉風土等浮詞填寫考語所保之員或改操於後干犯嚴處而原結之款查有確據則出結各官得予免議如所結不實旋經發覺即按濫舉之例治罪其保過人員陞任內實能稱職若有猷守棠

恩議敘優陞者該部於議覆時查明原結之上司開
單一併進 呈候 皇上睿鑒加恩如此則司道各官
更期汲引實才府州縣等官愈加勉求實蹟有地方之責
作親民之官急欲竭力奉行數事以獲陞用則地方已受
數事之益況保薦者不尚虛聲盡職者立有實效雖魯鈍
之才亦思奮勉鼓舞希圖上進於保舉之法或稍有益矣
請設馬廠以裕邊防疏 雍正十二年 劉於義

吏部尚書署理陝西總督兼辦軍需事務臣劉於義謹
奏為請設馬廠以裕邊防事 臣伏以 國家馬政為武備
之要連歲西路軍需調解馬匹陝甘兩省購覓甚難俱從
北路歸化城等處解送不惟糜費錢糧且長途遠涉難免
疲乏瘦損之弊況語云地用莫如馬即將來大兵凱旋邊
防要區原宜多為蓄養以備應用考漢時廣置廐苑設立

牧師苑監分別河西六郡北魏時以河西為牧地滋息馬二百餘萬匹唐時置八坊四十八監自貞觀至麟德年間畜馬七十餘萬匹是河西諸郡水草豐善原係前代畜產馬匹之所臣留心體訪聞西寧擺羊戎地方可設牧廠隨委原任西寧府知府黃澍前赴查勘黃澍稱擺羊戎周圍約二百四五十里其間荒地甚多且饒水草可牧馬六七千匹又肅州嘉峪關外之花海子湃帶湖一帶周圍約二百餘里水草富餘至甘州之大草灘涼州之黃羊川水草尤屬豐裕皆可設廠牧放臣請於羊擺戎花海子大草灘黃羊川地方各設馬廠一處每廠且先採買騾馬一千匹兒馬二百匹查兒騾馬西寧口外及陝甘內地尚易購覓騾馬每匹約需價銀八兩兒馬每匹約需價銀十二兩即可採買以為牧放孳生之用其擺羊戎馬廠即交西寧鎮

經理大草灘馬廠即交甘提標經理黃羊川馬廠即交涼州鎮經理范海子并帶湖馬廠雖係安西鎮所屬地方但安西甚遠離嘉峪關止二百里應就近交肅州鎮經理令安西鎮防護每廠各派游擊一員總理其事其牧長牧副即用本營千把牧丁即派本營兵丁亦毋庸額外多費錢糧每年以孳生馬匹之多寡即定各提鎮之數最如此經理數年馬匹蕃息於邊疆防守永遠有益矣

請粵東開鑄疏

雍正十二年

鄂彌達

總督廣東等處地方軍務兼理糧餉都察院右副都御史臣鄂彌達謹 奏為祇承 聖謨敬陳開鑄末議仰祈

睿鑒事竊粵東界連數省一帆可通若得就近開鑄不但本地錢文流通兼可資兩江三楚浙閩等省之用伏思粵東開採之議屢奉 諭旨嚴禁礦口悉封臣職任

海疆自應杜漸防微況利弊相因豈容輕舉妄動但臣蒞粵數載遍察情形熟思審計有可保其有益而無害者粵東山多田少生齒日庶生計倍艱查惠潮肇韶等府礦產甚多原係天生之寶以資民之生固宜應時變通以疏衆貨之源若以人衆堪虞易聚難散恐滋生事端查粵省鐵爐不下五六十座煤山木山開挖亦多傭工者不下數萬人俱各相安無事粵東向稱多盜邇來仰賴天威前此窠巢已成樂土民情漸知畏法苟得開礦營生方見踴躍思赴各立家室實無他慮查滇南開採多年並無他患湖南榔桂等處從前歷年開採粵西亦現在開採並無異說且銅鉛金錫皆地氣凝成此衰彼旺彼衰此旺更遞開之實可不匱不竭若以人多則穀價昂試思以本地之利養本地之民即以本地之人食本地之穀未開採之先

人不少而穀不加多既開採之後人不多而穀豈見少見
在連年豐收穀價平減惟不令外省游手冒入充工固萬
無人滿之患況本地居民各愛其生豈肯利歸他境更可
不禁而自杜臣請酌量仿照各省開礦事宜就本省地方
招殷實商民取具該地方官家道殷實印結令其自備資
本開採專委廉正之員董理巡查其招募人夫各州縣官
查出撲實窮民取具戶鄰保結編立保甲填明戶口住址
連名互結併可察匪弭奸實有利而無弊如蒙 俯准
就近開鑄則上裕國課下養窮黎流布錢文通濟鄰省莫
有便於此者矣

敬籌要地倉貯以備民食疏

雍正十二年

鄂彌達

總督廣東等處地方軍務兼理糧餉都察院右副都御史
臣鄂彌達謹 奏為敬籌要地倉貯以備民食事竊粵東

瀕海環山土狹民稠臣等通省情形如高雷廉三府產穀素多見又飭令地方官查荒開墾將來產穀必豐其廣肇南韶惠一帶歲有西穀源源接應復於西南建倉收買西穀積蓄饒裕足供緩急惟查潮州一郡人多田少該處穀石除供居民食用尚有閩省之漳州每歲采潮告糴舟楫絡繹小民止圖目前之利不思豫為蓋藏而閩粵均屬

朝廷赤子未便禁遏且有附近之南隰碣石亦時赴潮買運倘收成稍歉常平倉穀發糴不敷米價高昂緣潮地處極東即欲仰給西路柰距廣肇遙遠難以日計接濟此潮州積貯宜為籌畫又瓊州一府孤懸海外為全省屏藩重地鎮協營寨棋置星羅生齒殷繁商賈雲集本地產穀不敷一年之食且年歲豐歉無常米價低昂難定而常平倉穀又止有此數平糴之後一遇歉收買補維艱該處兵

民日食歲藉高雷販運以資接濟若商販少至轉輸不及一時騰踴殊覺窘迫此瓊州積貯宜為籌畫臣與撫臣再三斟酌潮州一郡議於所屬潮陽揭陽海陽三縣各建倉廩買穀積貯所需銀兩請於太平關稅借支銀五萬兩將二萬兩發交潮揭等縣地方官於秋收後陸續購買再將二萬兩委員賫赴西省採買運回尚餘銀一萬兩除倉廩工料買運脚價外餘銀仍酌量添買約計貯穀可近一十萬石其買回西穀道經廣州之西南如值春夏風雨不常即將穀石於西南倉內暫貯俟秋冬風信順利陸續運回各縣收貯自廣抵潮撥運亦易則該地穀價自可不致高昂即近而南澳碣石遠而閩省之漳州均可流連接濟至瓊州一郡民食待給於高雷兩府查歷來瓊商販穀赴雷者舟集徐聞海口赴高者船泊吳邑限門由海達瓊水道

不遠所有瓊州積貯穀石議於徐聞吳川二縣建倉併請
借支關稅銀三萬兩分發高雷二府各一萬五千兩轉發
徐聞吳川二縣及附近各州縣於秋成陸續買穀存貯除
去工料價費外可買穀六七萬石庶緩急輓運不難可以
刻期接應以上潮瓊二府借支銀兩約分十年扣還原項
新積穀石價昂發糶比市價稍平亦不獲有盈餘一併買
穀愈積愈多於 國計民生均有裨益矣

請苗疆文武互相稽察疏 雍正十二年 董 芳

鎮守雲南臨元潞江等處地方總兵官 臣董芳謹 奏為
請廣文武互相稽察之例以靖邊境事竊惟雲貴川廣等
省各種苗夷生長山陬固知法紀惟賴文武各官加意妥
輯極力撫循庶無蠢動之虞乃地方文武往往為異類可
欺科派擾累任意魚肉苗夷不通漢語無由控訴遂致忿

極思變又邊方土目原非善類禍以隨師効力者有微勞
給以土千把總職銜管理地方乃見其家道稍殷索詐無
休偶不遂意凌辱不堪亦致激成釁端擁衆悖叛督撫提
鎮遠隔省郡難以即知同城文武曲徇情面含糊隱諱所
以不及早為撲滅蔓延漸廣殊費周章且伏思邊省苗疆
與臺灣並重仰懇 皇上敕部定例凡屬雲貴川廣等
省各種苗夷地方比照臺灣互相稽察之條一體通行飭
遵則大小文武咸知警惕自必實力奉行邊疆可以永遠
寧謐抑臣更有請者邊地山箐深密官兵出征勢必調用
土弁以為嚮導其中誠實可用者雖或有之然亦止可令
其隨營出力不可假以威權乃不肖之員每因道路崎嶇
瘴癘侵染賊勢猖狂怯懦畏懼並不親身前往將剿賊辦
糧重任專委土弁經理遂有一種惡弁乘機恣肆搶奪公

行生殺任意且洩漏軍機賣放賊首樂於地方有事以遂其奸貪之計而軍前文武於賊人實在情形茫然不知祇得任其愚弄互相護庇冀其成功究經終年累月難以底定可否仰懇 聖慈亦令文武互相稽察告知督撫提鎮嚴查重處其有瞻徇隱匿者一體議處實於邊疆軍務大有裨益矣

請禁上司勒薦私人疏 雍正十二年 勵宗萬

光祿寺少卿臣勵宗萬謹 奏為請禁上司勒薦幕客長隨之陋習以絕弊源事查各省督撫司道以至州縣衙門刑名錢穀事務殷繁勢不能不延請幕賓以資協助但其間往往上司有勒薦於下屬者臣思屬員一切事件皆須上司督查若既薦幕賓以為親信可託自必急於稽查繼且通同容隱況出衆之才十不得一設遇其人自必留以

自助豈肯輕畀他人今既不自用而復薦之屬員則其中必別有隱情大約非故鄉親串即舊日知交在己身無以應其所求遂借下屬衙門以為周旋貧乏之地而下屬亦遂藉此為交結上司之端延至幕中以為有恃無恐一切任其主張而不肖之幕客儼然藉上司聲勢挾制把持主人墮其術中付之無可如何不敢過問又或上司之幕友援引朋儕分布各屬私相關說案規季規等弊若薦而不用品者則凡遇案件刻意苛求再三駁詰又或故為延擱動干違限處分屬員見事事隔礙不得不俯首聽從及既用其私人則辦理即有未協亦可將就通融且或代為更改刪供換詳等弊往往而有又有甚者則上下串通暗藏線索甚至出入往來毫無忌憚其弊莫可究詰至於長隨一項尤係微賤下流惟利是取罔知法紀滋弊更甚且以上

司而勒薦家奴尤屬非體臣請 皇上特頒諭旨敕部定例嗣後如有上司勒薦幕賓長隨者一經發覺照例嚴加處分則上下關防嚴密屬員不致掣肘弊端源絕而吏治於以肅清矣

請禁州縣徵糧之弊疏 雍正十二年 蔣 炳

廣東道監察御史臣蔣炳謹 奏為備陳州縣徵糧三弊請 旨飭禁以厚民生事竊惟 皇上膺圖御極首

以惠養黎元為務 賜復蠲租屬頒 諭旨復豁免

天下積欠錢糧浩蕩 皇恩固已普天共戴矣伏念

世宗憲皇帝十三載宵旰勤求惟恐一夫不獲其所凡

所以厚民生者事事舉行而於錢糧火耗尤厪 聖衷

所以各直省酌定分數嚴立科條禁止州縣加增屢經奉

有 明訓不啻三令五申乃有一等不肖州縣外雖不

敢明示加增而陰為股削巧事誅求如開徵時每於花戶名下暗行飛洒增添分厘蓋田分九則起科原各不同而一户應納之銀必有總吏櫃書造冊而條編之數各年不同從無一定花戶無從查考所以易於飛洒在每畝所加雖屬毫厘而合縣計之如江浙財賦重地即至盈千累百何莫非民脂民膏此官吏飛洒之弊皆由小民不知正賦定額之所致也至花戶納銀俱照部平加增火耗交納而州縣折封每借短平名色硃票空袋每兩填註輕平三四分不等任用心腹胥吏立押花戶添補又不發出原銀稱兌以致胥吏因緣為奸偷出折過空袋私用硃票開寫分數向花戶勒索花戶以無原銀可對若欲告理其費愈大只得隱忍添補其原袋隨即銷燬所以上司無從覺察在百姓於正賦之外多費一分即受一分之累在州縣每兩

多取數分則積少成多動盈千百此空袋補平之弊皆由
不發原銀稱兌之新致也又花戶傾銷銀兩定例禁革官
匠而各州縣中仍設立官匠串通胥役盤踞衙門左近凡
花戶納銀若無官匠名字印記即不准投櫃又不容別鋪
銀匠傾銷只得倩求官匠而各匠任意勒索包完出串每
兩侵漁六七分不等蓋書吏銀匠通同一氣而州縣官既
貪其傾銷元寶可以剋扣又希圖節省串費且官銀匠又
暗有餽送彼此分肥遂違禁容隱以致小民受累此官匠
刻剝小民之弊皆由不遵定例禁革之所致也以上三弊
查直省州縣皆然而江浙為尤甚仰請 敕下該部通
行直省督撫嚴飭州縣嗣後徵收錢糧每年照部頒定額
由布政司核明刊示遍行曉諭使人共知科則銀數將
書吏飛洒之弊永行禁止其折封時照部平稱兌如果花

戶短平即將原銀發出較準補足其不發原銀止將空袋
押補之處永行禁止至花戶納銀不拘何處銀鋪聽便領
銷止令銀兌足無抄棍其官匠勒索私用印記之處永行
禁止該督撫等實力查察若州縣陽奉陰違即行嚴參治
罪如果臣言不謬伏乞 皇上睿鑒

皇清奏議卷三十二

皇清奏議卷三十三

敬陳實政二事疏 乾隆元年

允禧

宗人府左宗正正黃旗漢軍都統多羅郡王臣允禧謹
奏為敬陳管見仰請 聖裁事 我皇上膺圖御宇

宵旰勤求用人首重諄諄

訓諭惟期以朝皆俊又野

無遺賢為殷殷凡在廷臣工理宜仰體

宸衷悉心察

核舉直錯枉實力奉行方盡厥職以臣愚見竊以為一在

保舉之宜慎也一在彈劾之宜實也敬為

皇上陳之

以祈

聖訓夫古者建官惟賢位事惟能或以德進或

以事舉歷代皆然故薛包之舉以孝讓橫渠之舉以講學

陳平之舉以奇謀匡衡之舉以材智必在家實有善行之

可指而居官始吏治之有聞所謂考廷獻於家修之際也

今保舉之人雖未必有賄賂植黨之情而豈能盡以人事

君之義保舉者不過含糊數字之考語以為行實臣以為各舉所知者謂知其人之行也某也孝必有負米養志之可指某也廉必有瘞鹿懸魚之可錄某也文武兼資必上馬舞稍下馬作露布某也理煩治劇必日發百函五官並用雖全才難得實指其一二事之表見庶幾用仁去貪用智去詐之一端也夫屬官之陞轉則以勤慎明白等字填註為宜若不拘資格特保之人必圭璋特達之才方可勝任而愉快豈含糊數字還可盡其生平況孝廉方正之舉已奉 旨詳烈實行今臣工特保之人恐未必盡出於至公程功積事之謂何臣以為保舉之宜慎者此也科道乃朝廷之耳目風聞言事乃其所職大言入則望大利小言入則望小利近日言官之章奏不過以聞雜無聞之事以塞其責彈劾者亦止拾撫細故以為能事一在畏憚一

在附和乃其人在位之時寒蟬不語及敗露之後交章彈劾者往往而是臣以為苟其人不良不問高位下僚皆宜劾奏如魏相之去副封呂誨之彈參政方稱鐵面今言官舉動尚未先畏忌附和之見存於中殿中執法之謂何臣以為彈劾之宜實者此也臣請 敕下在廷諸臣嗣後特保之人必實指其行事即一二端之足取亦可備因材器使之用不則未可使不拘資格之舉以之便奔競之路也科道之官有聞即奏無避貴要凡督撫部院八旗大員果有居心不良行事乖張者該管科道當日知而不言敗露之後即責以徇庇之咎如此則賢才庶可登進貪士不致竊位而 朝廷收用人之實效矣

謹陳鹽政變通事宜疏

乾隆元年

朱軾

文華殿大學士兼吏部尚書臣朱軾謹 奏為謹陳鹽政

變通事宜以備 聖明採擇以期裕國通商便民事欽

惟我 皇上御極以來深恤民隱 寬大之詔屢下

舉凡錢糧課稅兵刑禮法之所在為臣下奉行之未當者
無不逐一釐正措施期於盡善固已四海共沐 恩膏

無不歡騰鼓舞矣惟是鹽政一事上關 國計下繫民生

向來各處俱定有規條而法久弊生每滋紛擾上厯

聖懷有不得不急為講求補救者臣查出鹽之地有海有

池有井而各省鹽法辦理不同始或因地以制宜今當從

長而定議去其弊則利自興便於民始有補於國臣謹就

平日見聞之所及酌目前因革之所宜敬抒管見為我

皇上陳之

一行鹽地方宜酌量變通也查各省不皆產鹽所以必藉
商人行運但即以江南之鎮江等府而論與淮揚相去甚

近而向例必食浙鹽浙江路遠商運需費鹽價自貴而淮鹽就近可得價亦甚賤矜賤買貴人情所難近日丹徒縣販私搶鬪一案所謂私鹽者蓋即淮揚之官鹽因其非浙商所賣之鹽即謂之私耳夫淮浙雖有不同以國家視之食鹽無非赤子完課總歸正供此疆彼界有何區別徒以商引銷積之不均致使小民法網之不免自應令各督撫會同鹽臣斟酌變通如鎮江等府竟改行淮鹽其餘各省似此者甚多如河南上蔡等縣本有河東之鹽而必銷淮引湖廣巴東等縣逼近四川之界而必食淮鹽有一省而各府所食之鹽地方不同者有一府而各州縣所食之鹽地方不同者俱應就鹽地之遠近逐一查明盡為改易則一變通間於國家既毫無所損而民之受福不少矣一各州縣銷引宜通同計算也查商人行鹽各有地方州

縣銷引原有定額是以舊例不許越界買賣但犬牙相錯之地有此縣莊村插入彼縣地界者就近買食官鹽即為犯禁查拏拘繫往往不免而本縣所設鹽店或遠在數十里之外小民食鹽無幾欲其捨隣近易買之鹽而遠求於數十里之外此必不可得之數也況水陸之裝載有難易鹽斤之積貯有盈縮而價之高下因之若必拘定所屬地界甚為不便而愚民之易至於犯禁令也必矣夫額定之引目原量烟戶之多寡此縣之民買食彼縣之鹽則彼縣之引必不足而此縣之引自有餘何不即以有餘之引補充不足之數合總計算自必有盈無虧臣請 敕下各處督撫鹽政諸臣酌量地界相連之處或一府或數州縣合為一局將所領鹽引通融行銷不拘商買分地無論州邑界限聽商民就便交易庶引課民食兩有裨益

一竈戶煎鹽宜令商人助其資本并酌定賣私治罪之例也查定例竈丁人等夾帶餘鹽出場及私煎貨賣者同私鹽法乃近來掣獲私販止據現獲之人問理並不根究竈戶不知私鹽皆竈戶所鬻若使場竈間無私出之鹽奸徒何從興販故欲杜絕私梟必先清查場竈而欲絕場竈之私出又必先體恤其苦情凡竈戶資本多稱貸於商人至買鹽給價則權衡子母加倍扣除又勒令短價竈戶獲利無多鹽復有餘且恃私鹽事發罪亦不及是以敢於售私實由鹽商驅之而該管官縱之也臣以為宜令商人認定竈戶酌給資本使得及時煎晒雖遇陰雨連綿鹽斤不致缺少於商人亦大有益其價值於掣鹽時該管公同酌定竈有餘毋不足務使竈丁得沾利益庶日用有資而工本無缺然後嚴絕私售之弊而治之以法除老幼負擔四十

斤以下許照例賣給今鹽場大使驗明掛號准其出場並逐日報明分司此外人非老幼籍非本境鹽過四十斤以上者一概嚴行禁止煎出之鹽務令鹽商儘力多買或露積或貯倉大使逐一查明封識如有聽憑商人偷運及違例賣與梟販等弊將竈戶分別究治該管大使以縱容論罪再大使微員守法自愛者甚少應將分司丞倅移駐場所責令監察如此則私弊可除竈丁亦不致受累矣

一附近出鹽地方鹽價宜減也查私鹽自三四百斤至千餘斤者皆大夥梟販運至遠處發脫此其窩頓有地出沒有時來踪去跡容易追尋且惟江岸河干船隻往來之地方文武官及水陸關口果能緝查嚴密奸徒自然銷阻惟四十斤以內不在禁例而五十斤至一二百斤者俱在近地百里之內售賣蓋遠則擔負非易工食費多得不償失

也貧鹽之家每冒禁而買私鹽者不過以其價賤於官鹽耳與其嚴挐而滋擾不若平價以杜絕凡附近出鹽地方百里之內將官鹽價值減與私鹽之價相等則民間皆食官鹽私鹽不禁而自絕矣在商人於出鹽近地既少搬運盤駁之費鹽價自應酌減況食鹽地方遼闊此附近百里之內不過十百分之一何必定要昂價彼奸徒販私原圖厚利即照彼減價亦可償本完課有餘何憚而不為耶一鹽引額設多餘之處宜行酌減也竊 國家休養生息天下戶口誠日加繁庶然民間食鹽以家計之豐嗇為多寡即稍豐之家見鹽價騰貴亦必加意節省鹽斤所銷究不能多乃數十年來引目之數或議加於司鹺之員或請益於封疆之吏或據商人公呈或稱兆姓情願時有增益究之頻年壅滯照數徵完者甚少似宜令各該督撫逐一

確查議減與其多餘而必欠存紙上之虛名何如減少而易完收久遠之實效至於鹽規一項立法之初本無此名色緣行鹽利息飽餘各處不免飽送遂爾相沿成例近因各官俱有養廉此項久經禁革間有存充公用者雖係商人情願急公但恐各官非皆潔己之員舊規既去或又巧為生發商人照舊飽送無非出之於鹽則無非出之於民並懇

皇上敕下直省嚴行申禁其存充公用者亦酌量減免以裕商力蓋懲商必先恤商恤商即所以恤民也一商人宜加甄別並慎為選擇也查運鹽辦課有本有利必身家殷實之人始能承辦無誤且知自愛不致生事而各處引名俱向來頂定有初本有餘而花銷敗落仍然為商者亦有豪強棍徒欺壓霸佔者又有私相售賣項名鑽充者或係赤手無籍之徒或係兇棍不法之輩始則夾帶

營私繼且窮奢極欲誤引虧課諸弊業生欺官累民無惡不作此皆商中敗類也宜令巡鹽等官嚴行稽查並著衆商從公舉首逐一甄別慎選老成富厚之人情願承充者更立引名使之承辦仍不時教訓衆商嚴加管束務令謹身節用盡去從前積習勉為善類其子弟俊秀者設立義學延師教授如此則商賈亦敦善行而風俗歸淳厚矣

一鹽價宜公平酌量使商民兩無虧累也凡商賈貿易賤買貴賣無過鹽斤總緣裝運達涉既多使費而鹽商糜費花銷又復不貲皆取給於鹽此鹽價之所以日益增貴也每見封疆大吏及巡鹽御史有庇護鹽商者任其高抬從不過問而操守廉潔之員不收餽遺又或刻意核減至於已極商人見定價太賤因而匿鹽閉市反致滋擾戶以為應隨時酌定中平價值使買賣兩無虧累自然相安無事

又商人行鹽多存貯省會其各處行銷係本地小商領單轉販運往城郭市鎮會總之處開鋪發行其各鄉村小店又從城市販往層層遞運費亦遞增而經過地方盤驗掛號使用尤多是以遠鄉鹽價較之發鹽之地往往加倍臣請敕下督撫嚴行禁革如有借端需索許販鹽之人據實控告審明題參計贓治罪再鹽從省會遞運斷無夾帶私鹽之事並飭免其盤驗以省守候之苦庶鄉村小販得沾微息而鹽價亦不致太貴矣

一荒僻鄉村宜擇良民領鹽零賣以便民食也查窮鄉僻壤難於銷鹽之處從無開設鹽店窮苦小民經年食淡或煎熬鹹土充食以致生病老人尤不能堪間有家道充足之人從城市多買數斤攜歸途遇巡兵盤詰訛詐往往不免請令有司於荒僻村莊擇一謹厚良民給以小票令其

領鹽零賣賣完繳價又復發給如此則衰老窮民得以就近零星買食而於鹽斤之行銷亦不無少補矣

以上數條皆臣從前所經地方及近來察訪略知梗概者此外臣所未知及知而不能確信者不敢以入 告也夫國家度支經費所關甚大豈可輕為置議惟是弊不可不除而法不可不善必揆之上下而皆宜斯行之久遠而無弊 臣仰體 聖意之憂勤敢獻芻蕘之末議伏乞 皇上睿鑒

請修楚省江岸疏 乾隆元年

史貽直

經筵講官戶部尚書署理湖廣總督兼理湖北巡撫事務臣史貽直謹 奏為江岸坍塌日甚會城民命攸關亟請修築以資捍禦以固金湯事竊照武昌為楚江省會雄據江浙上游溯荆襄沅澧之通津處秦蜀滇黔之扼要岷江

之水湍激東奔汚漢之川沸騰西匯大別山聳峙其北高
羅峯屏列於南黃鵠磯之址橫決靡常白楊湖之波汎溢
莫測沿城西南一帶適當二水之冲兩山之夾每遇暴漲
勢若建瓴駭浪洪濤吞啜城堞粵稽古蹟唐宋既築長堤
元明每加修治壘以巨石保以松栴銅以鐵治鎮以鑄屏
當年鹽艘俱泊武昌城南鮎魚口例係淮南商按船帶石以
資修補迨後鹽船移泊漢口遂弛輸石歲修之事年來日
就頽圯向之高廣堅厚者今且坍陷傾廢矣小民無知每
將坍圯土石乘間窀取日侵月削習為故常目今沙土淤
鬆狂瀾冲激每當西風波撼江漲連天水勢直刷城根時
虞漫溢臣檢查舊案從前督撫諸臣屢經商謀修築祇以
工程浩大費用不貲旋估旋輟由是坍圯輒陷之形日甚
一日臣抵任後日擊沿江堤岸頽塌難堪若不及今修築

將來傾卸愈多所費尤鉅總緣長風巨浪晝夜吞吐坐見
壓舍垣墉高下剝損凡係保障城池之所係實為生靈民
命之攸關我 皇上視民如傷誠求保赤凡利益民生
之事每不惜帑金多方軫恤 仁恩普被率土均沾況
武昌為九省通衢萬民托命臣身任封疆敢不仰體

宸衷經營措置隨檄行藩司遠委道府大員逐加確勘據
報自望門山外王惠橋起至武勝門外土城磯止正岸綿
亘計一千三百一十九丈五尺護岸計六百八十八丈通
計正護兩岸共二千餘丈確估工料需銀十一萬一千九
百三十七兩九錢零遂加核減委無浮冒其所需之項查
湖北藩庫內現有存留商捐修堤銀五萬九百五十餘兩
又於徵存二分公項內動支銀二萬兩合計七萬九百五
十餘兩請將緊要工程先於今冬水涸之時亟為修築此

外不敷之數再於來年動支公項銀一萬兩此後口岸徵收之銀除臣衙門一切公費外如有存剩亦可按年動支又臣標滿兵八十名向有南北兩省每年幫貼養贍銀三千八百四十兩今滿兵已經撤回荊州此項銀兩無須支給均可按年湊用足敷經費無庸議動正項至興修之期請限以三年分段次第修理其承修督修之各官臣逐一揀選務擇實心任事諳練工程之員分別委用緣係保護民生事理未敢因循延誤謹將江岸坍塌逼近城郭務宜及時修築情形恭摺陳奏伏祈 皇上睿覽

請修復浮橋疏乾隆元年

劉於義

吏部尚書署川陝總督兼理甘肅巡撫印務臣劉於義謹奏為恭水衝決浮橋事臣查蘭州西門之外下臨黃河向有浮橋一座用船二十隻中空水道排列河中上用大

鐵索二條橫亘河面兩岸拉列木椿牽挽鐵索將河中之船俱繫鐵索之上使不可動移又用竿大索數條植橋索纜以相維護上架木樑鋪以木板旁設欄杆以通河西凡文報絡繹車馬往來商賈行旅無不由此實為河東河西咽喉要地雍正八年臣在蘭州時值春水驟發黃流湍急曾將河橋船隻全數衝失經前任同知梁德長竭力捐造復成今六月十四日大雨時行山水湧發各山木植順流而下又復將河橋衝失臣因相度地勢皆緣浮橋兩岸築有馬頭二座每座計長三丈五尺兩岸共長七丈插入河中以致河流束緊愈肆湍急又鐵索止長七十丈所立椿木即在馬頭之上不能堅固以致水急力猛鐵索脫椿隨船而去臣思自八年至今七年之中橋已再被漂毀要可不為久遠之計因檢蘭州志書見前明蘭州衛守備李進

改修河橋記云浮橋建於前明洪武壬子年用舟二十四艘後守備苗旺以造舟費大乃於兩岸梵出埠頭減其二舟止用舟二十有二埠頭水急舟常衝激流蕩其流者莫之能返未免復有所造雖云省費而反重費勞人正統乙丑奏請重修埠頭增造二舟以復其舊於是河廣水緩而舟咸無衝激之虞有司免重造之勞恐後守此土者莫究其由復欲減造舟之費以蹈其弊故書於石以識之又臣差員細查馬頭十餘丈之上有二鐵柱其東柱上鐫洪武五年歲次壬子字除埋於土中者難於丈量外其高出土面者計長五尺八寸圍圓四尺九寸西柱上鐫洪武九年歲次丙辰八月吉日總兵官衛國公建斯柱於浮橋之南繫鐵纜一百二十丈字除埋入土中者難於丈量外其高出土面者長九尺四寸圍圓四尺六寸臣又差員至河西

查物東面亦植鐵柱一上鐫衛國公達斯柱於浮橋之北
其餘文略相同除埋入土中者難於丈量外其高出土面
者計長八尺五寸圍圓四尺五寸惟獨無西柱臣檢臨洮
府志云兩岸西北為鐵柱四各長二丈其後一柱落於河
底唯鐵盤尚存今三柱堅緻雄壯屹然如故是浮橋原用
二十四舟從前減去二舟梵出埠頭已有水急衝失之患
今浮橋止用二十舟較之原製減去四舟是馬頭益出水
益為急宜乎屢屢衝失臣愚似應將馬頭每座減退三丈
五尺仍請用船二十四隻庶河廣水緩怒濤不至衝激至
鐵索原係一百二十丈今失去之鐵索止有七十丈並不
繫於鐵柱之上另植木椿以致搖搖索脫隨船而去今亦
應各添造五十丈共一百二十丈仍繫於鐵柱之上其河
西所少鐵柱一根用大木椿代之方可不致動搖古人成

法具在自宜愼而行之但河橋稅銀原額每歲止解銀一百三兩八錢三分從前頗有盈餘橋即衝失管稅同知可以修造今河橋稅銀儘收儘解並無餘剩同知每年止有養廉銀八百兩力量不能捐賠臣查詢八年衝失之後除鐵索於硤中尋獲外造船鋪墊等費需銀二十九百餘兩現在戶捐養廉銀一千兩布政司捐養廉銀三百兩按察司捐養廉銀二百兩臨洮道捐養廉銀一百兩共有銀一千六百兩其餘令同知馮慶曾設法捐造至拆去埠頭添造船四隻並鐵索二條各添五十文共一百文需用荒錢一萬二千斤以及修改馬頭等費仰懇 皇上天恩可否准動公用銀兩作正項報銷庶愼照成法可為經久之計矣

請立募資勸懲之法疏

乾隆元年

吳應棻

兵部右侍郎臣吳應梁謹 奏為幕賓之錮弊有妨吏治
請設法勸懲以杜朋欺以收才智事竊以賞罰者懲勸之
攸關禁進者賢愚之同駕名重於利則中材咸勵潔清罪
浮於財即下愚亦知顧忌惟有利無名得財不罪將中材
化為下愚下愚流為無忌憚而後已則今直省督撫司道
郡縣之幕賓是也夫督撫司道郡縣即有傑出之才不能
不待助於贊襄之人否則事務填委不致投權於吏胥不
止故幕賓之不可無者勢也然而幕賓之滋弊實甚當外
官蒞任之始聘任幕賓高其聲價及其進署也才且賢者
助本官為公正為循良為廉幹固不乏人其次則依違曲
從苟且館餐本官之聲績考成一切不能為力又其甚者
作奸犯科串通關節扶持長短在上司衙門者陰藉下屬
為奇貨在下屬衙門者佯指上司為引援本官稍不覺察

即身受其累此輩則囊橐飽颺立身事外出一衙門又入一衙門營業之燕初無定主或賓主不和則在他官幕中必盡力翻駁以快其憤或勘擬錯誤則在後任幕中必極意文飾以怙其非近年來更有一種坐省幕賓在一二上司衙門者為之主持乎朋引類散布郡縣緣索相通入其夥者文書中詳曲為照應非其黨者吹毛求疵概與駁詰此風不息其貽害於吏治不小從前

世宗憲皇帝洞

燭其弊曾命督撫保奏幕賓以彰激勸後雖有一二保送而行之未過久而新弛臣愚以為法本無弊其咎在人人所難防宜濟以法督撫司道府縣官

皇上命之以牧

養斯民也而幕賓入佐督撫司道府縣官以牧斯民者也官有賢否幕賓亦有優劣乃

皇上黜陟大吏矣大吏

之幕賓無與也大吏進退長今矣長今之幕賓無與也夫

資其才智以階勲庸與被其播弄以罹貶斥而國家之刑賞曾不及焉此若輩惟利是圖而視賓主如秦越也罔命曰簡簡乃僚其惟吉士是三代以前大官得自簡僚屬之明驗漢有公府辟召外而守令皆得辟除其屬唐宋以來亦多自辟幕僚臣請略仿漢唐宋遺意仰承

世宗憲

皇帝鼓勵人材之盛心而推廣之凡督撫衙門設七品幕職二員兩司設八品記室二員以董其成皆報明吏部按品揀選府州縣設立一九品掾司皆令申明督撫或本人有出身者計考與先用本官降革不准與考本官或以贓酷敗露不能救正定議處分後官得辟留前任之幕賓陞調亦可帶往他省如此則賢且才者知所鼓勵樂助本官相與有成即中材以下亦畏罪不敢為奸夫胥吏之中尚有人材經制考滿例得錄用何況幕賓半屬才智有餘諳

練明習與以進身即求才之路益廣不惟革弊且可以得人矣

慎舉孝廉方正疏乾隆元年

勵宗萬

刑部左侍郎著禮部侍郎事務臣勵宗萬謹奏為請慎
孝廉方正之舉以取實行以重名器事伏讀雍正十三年
九月初三日 恩詔內開一款各府州縣衛各舉孝廉
方正暫 賜以六品頂帶榮身以備召用此誠我

皇上敦崇實行鼓勵勸興之盛意典至隆 恩至渥也
但 國家設此至隆之典以待實行之人必期所舉之得
人先須舉者之核實稍有冒濫即有屈抑惟慎重於其先
乃以杜奔競之漸更釐剔於其後乃以絕僥倖之心從前
選舉各官鮮克公當未免衆議叢生所號為孝廉方正者
非鄉井有力之富豪即官場有名之學霸迨服官之後庸

者或以劣參黜者或以賊敗臣以為不核鄉評之實蹟無以得真才不嚴濫舉之處分無以絕奔競請嗣後凡府州縣衛保舉孝廉方正悉由該地方紳衿耆庶鄰右里黨合詞具呈該州縣正印官采訪公評詳稽事實其所舉或係生員許會同教官查核並開造事實清冊加具印甘各結備文申府由府而司由司而院遞加嚴核然後具題倘無堪舉之人寧缺無濫選舉人員赴部投到後請 敕下九卿翰詹科道公同驗看詢諸本人之同鄉參諸衆人之公論均無異議然後照 恩詔事例給以六品頂帶倘所舉不實或被舉發或被題參除將本人斥革追究外其濫行出結各官照濫舉匪人例分別治罪受財者以枉法論又或各衙門胥役借端需索致有力者逋同扶捏無力者勒捐留難一經發覺照衙役犯贓例治罪該管上司失

於覺察者一併照例分別議處如此則選舉不致濫冒名器不得倖邀似於懲勸之道稍有裨益也

篤宗族以厚風俗疏乾隆元年

蔣炳

內陞監察御史在總理事務處行走加一級紀錄二次臣蔣炳謹奏為敬陳管見仰祈聖鑒事竊惟堯舜之道不外孝弟熙皞之風成於親睦經云一家仁一國興仁一家讓一國興讓孟子云人人親其親長其長而天下平良以人各有親人各有長由親長推之則人各有宗族此親長之理可由一家而推及天下也從來人心風俗之轉移自世家巨族為之倡而兼化之行又先自貴者始近世士大夫於宗族親黨固有好行其德者亦有自私自利者且有妻子饜粱肉而手足耨耨不繼者奴僕乘堅策肥而族黨凍餒不顧者更有起於寒微曾受族黨侵侮一割得

志便思報復而攻訐訟奪過於仇讐者其子弟化之爭產
競財互相控告視骨肉如路人等親愛於秦越以士大夫
之家而尚如此又何以責細民之冒凌詬誶乎我世
宗憲皇帝因世風之日趨於薄也於張琪范瑤等之捐立
公產周卹族人皆交部從優議敘以風示天下而士庶中
猶有薄其宗黨未臻淳厚者則以有勸無懲而令典未彰
也伏惟皇上至孝至仁克明克類隆本支百世之誼
篤行葦常棣之情所以加恩宗室優禮天潢者至周且
渥雖堯之親睦九族無以加此伏見詔旨所頒上自
公卿大夫下至武夫悍卒鄙夫愚婦莫不色慚神悚感奮
涕泣可知孝弟之心人所同然一感發而丕應矣若由此
而定以睦族勸懲之法則風俗之厚可易致者臣愚以為
在位大臣官員以及世家巨族俱宜仰體皇上之心

以為心敦實行篤族誼各隨其力之所能以卹其宗黨若有能捐產入宗祠周族人者請令有司另列其田數於籍免其雜徭並交部議敘其士庶之家族姓在千丁以上許本族公舉謹厚者一人以為長訓迪族衆三年之內族人無干禮犯法涉訟公庭者州縣給匾獎勵若遇荒歉之年凡族人有能周卹族衆不使流離失所者督撫酌其輕重或給匾獎勵或題請給以頂帶榮身如身膺祿位恃勢擁貲欺蔑宗族者督撫據實題參輕則示罰重則削秩其身列學校者至歲考時許族人將實行具呈教官申送學臣學臣閱文而核其實為宗族所稱許者文雖遜亦得免下考為宗族所指斥者文雖優不得列上等於發業內詳加分別列其實於下以愧恥之復誠勉之如此則有所勸以勸其企慕之情復有所懲而去其澆漓之習卿大夫倡於

前士庶人興於後大吏有司實力訓勉勿等具文數年之後有不禮讓成風者未之有也且通計直省州縣雖大小之不同而一州縣中必有四五大姓或千餘丁或二三千丁此大姓之族必有醇謹者數人富厚者數家果能各卹其宗族互相勸勉資助則數大姓合族之人即無生事為非之輩不特平時獄訟爭鬭之事可少即遇水旱災荒之歲且能各為存養不至有流離失所之人於以仰副皇上德意自可上追唐虞三代親睦之風以成熙皞之盛矣

請嚴藩臬等衙門積弊疏乾隆元年 夏之芳

協理河南道監察御史臣夏之芳謹 奏為請嚴藩臬等衙門積弊以清贓罰之源以釋州縣之累事臣竊查 國家計吏必大法然後小廉各直省州縣衙門如有犯贓不

法等事該管上司皆知嚴行審訊獨該上司衙門積弊甚於州縣而絕不究問在藩臬等官身為大吏或知守法奉公而衙門吏役盤踞勾通借端刁難百般需索歷來甚為滋累蓋州縣所辦事件殷繁與上司衙門胥役多有交涉一切案件無不需索規禮往往假公濟私借名批駁其任重、大案情圖為指駁有名即平常事件亦吹毛求疵再三駁詰借事生風恣意勒稍有不便反以遲延違誤等情坐致州縣之罪藩臬道府衙門皆所不免而藩司衙門尤甚藩司為一省之總匯更有錢糧關係凡閩屬正雜錢糧徵解有費支領有費盤查有費奏銷有費以及各官俸薪各營兵餉各項開銷經費除扣平之外又須做銀甚至並非關係錢糧而亦刁難需索不飽不休種種積弊難以枚舉更有累者州縣承辦事件該上司每不論事之鉅細即

差役守候一本本官文票達州過縣沿途求需而承辦之州縣接以賓禮重以錢物任意巧取與書吏表裏為奸無所不至該州縣既因案件在其掌握又恐有碍上司情面不得不吞聲隱忍設法給與因此不肖州縣官吏即借名上司衙門費用勒索民間重耗科派之弊往往由此而起臣愚以為欲杜州縣之賦私當嚴上司之苛累欲禁吏役之需索須嚴大僚之考成應請 敕下直省督撫逐一嚴行禁飭仍不時嚴為訪查如有借端批駁並刁難扣剋需索等弊即將該吏役捉拏究追仍將該管官照失察衙役犯贓等案內首出情節者除將該管上司官吏處分外督撫亦照徇庇例議處如此庶司道等衙門均知約束吏役不致縱隱作奸各該州縣得免額外之誅求案牘既不滋擾而科派朘削之弊亦不致下累閭閻矣

請定試博學鴻詞之例疏乾隆元年 吳元安

巡視北城協理河南道事監察御史加一級 臣吳元安謹
奏為請 敕定考試博學鴻詞之例以拔真才以光
盛典事欽惟我 皇上聰明天亶遊志時敏凡宣為

綸綍著為今典者皆以聖賢之心為心而以聖賢之學
為學乃猶旁求下問屢 諭各省督撫及在朝大臣延
訪博學鴻詞速行保薦且於先行來京者月給廩餼以贍
資斧此誠我 皇上培養人才有加無已之至意臣伏
思博學鴻詞原非以記問誇多詞章競艷者也古聖心傳
昭著於經歷朝政治臚列於史是經史者人品之模範即
為學問之淵源必融會熟習於胸中自學為有用之學而
言亦有用之言內外大臣果能真知灼見慎厥保薦斯可
以稱得人之慶而備 睿問之選所以立賢無方內自

主事中書外自州縣佐貳以至青衿布衣之流試其文學最優者咸得通籍翰林諸書中祕典至隆也責綦重也臣竊思考試之法向例以詩賦論三題限以終日誠恐淹遲敏拙各異其資在沉潛淹貫積學深思者或不足以盡其所長而纖才薄植工於摹擬者或轉得邀其倖試臣請敕定首场試以經史發難論辨覘其抱負越日二場試以詩賦擬古應制觀其詞藻皆許自辰至酉夜則准其繼燭俾得大展生平所學以仰承 聖天子特達之知自有執經胙史彈見洽聞者出而為 國家用如是則真才立見而彘彘者不得溫乎其列矣

請定工程以杜冒銷疏 乾隆元年 曹一士

工料給事中降二級留任 臣曹一士謹 奏為工料之價值有定官吏之尅減無常請 旨敕下直省明刊成數

懸示工所以杜冒銷事伏查雍正十三年刊有 內廷

現行則例及物料價值一書鉅細畢載成法井然惟是各省興作隨地度材或因時庀役當俟各督撫題達到日核議請 旨頒刻通行期於價平貨善康稱工食 聖

朝寓明作於考工小民即子來以食力行見月要歲會弊絕風清矣乃臣自到任以來每日接讀本章及揭帖手本內有以浮冒効參者有並無工料數目籠統開載致千部駁者有駁詰之後始行冊報仍與部例不符勒令追賠者有隨參侵冒隨罰重修者有勢難重修姑仍其舊稍為彌縫賠補者凡此皆冒帑誤工累民病役之大略也夫事後之糾參不少則事前之防範宜周臣竊慮不符部例之冒銷易知名符部例之冒銷難測也何則各省未興工前確估報部已竣工後委員勘實此常例也然九卿所定之例

各工所估之數惟直省大員知之領員知之勘員亦知之
即吏胥輩皆得與知之獨彼列肆之商賈力作之匠徒則
茫然不知夫既不知工料應得之數則物值之高者賤之
就下工價之多者抑之就寡且曰國家之定例如是而
節省之名歸於公侵漁之利入於私矣即如州縣凡有濬
築必按圖甲起夫票捉載拘始行就役使其果符部例窮
民盡堪餬口何不踴躍赴工致煩迫促如是即則皆官吏
隱秘成數以逞其伸縮出沒之奸所致也臣以為物當其
值役償其勞國家率作者成之事功豈可為臣下出少
入多之費索且工程先經核減成數復不全給若大員毫
無扣剋屬員何敢冒銷未可徒以事後一參姑塞其責也
伏乞 皇上敕下直省督撫凡一切營造開濬所需物
料工匠遵照部例估有成數一面題達一面即飭該府州

縣備錄達部細數如堂宇之層間高廣船艦之濶狹淺深
木石之長徑寬厚土方之段落丈尺磚瓦灰釘蓬索等之
斤兩分寸船運車載夫指等之里數僱費逐細開明分書
其價並大工每日給銀若干小工每日給銀若干悉行刊
刻榜文實貼各處工作卑地方多為印發以防遺漏俾公
平正大之價值衆目共覩衆耳共聞少有伸縮出沒彼行
戶工匠處處可以訪察人人得以指證雖有不肖官吏包
攬匠頭驅之明目張胆之迹各懷口衆我寡之懼而貪者
莫敢不一於廉矣安有籠統開報於事前侵冒追賠於事
後者哉如此則費匠競奮工築堅牢不特慎持國計亦以
保惠官民臣在工言工是否可採仰祈 睿覽